

# Y Pwyllgor Menter, Arloesi a Rhwydweithiau

**EIN(2) 01-06(p.8)**

**Dyddiad: Dydd Mercher 3 Mai 2006**

**Lleoliad: Ystafell Bwyllgora 2, Y Senedd, Bae Caerdydd**

**Teitl: Blaenraglen Waith Strategol**

## **Cyflwyniad**

1. Yn ôl Rheol Sefydlog 9.9, mae'n ofynnol i bwyllgorau pwnc gynnal blaenraglen waith dreiglol o 12 mis o leiaf, a chyflwyno eu rhaglen waith i'r Cyfarfod Llawn, ar ôl ymgynghori'n gyntaf â phwyllgorau pwnc eraill a Chabinet y Cynulliad.

## **Camau Gweithredu**

2. Gwahoddir y Pwyllgor i drafod y rhaglen waith gysylltiedig a chytuno ynglyn â hi.

**Chris Gwyther**  
**Cadeirydd**

Mai 2005

# Y Pwyllgor Menter, Arloesi a Rhwydweithiau

## **Blaenraglen Waith**

**Mai 2006 – Ebrill 2007**

## **Cyflwyniad**

1. Mae'r Pwyllgor Menter, Arloesi a Rhwydweithiau yn un o saith Pwyllgor pwnc y Cynulliad Cenedlaethol. Nodir cyfrifoldebau'r pwyllgorau pwnc yn Rheolau Sefydlog y Cynulliad Cenedlaethol, y gwelir rhan ohonynt yn Atodiad A.

## **Dyletswyddau'r Pwyllgor**

2. Yn unol â s57(4) Deddf Llywodraeth Cymru 1998, mae cylch gwaith y Pwyllgor yn seiliedig ar bortffolio'r Gweinidog dros Fenter, Arloesi a Rhwydweithiau, sy'n cynnwys:

- Arloesi a mentergarwch;

- Polisi diwydiannol a chymorth i fusnesau;
- Mewnfuddsoddiad, hyrwyddo cwmnïau cynhenid a datblygu rhanbarthol;
- Trafnidiaeth;
- Ynni;
- Twristiaeth;
- Cyfrifoldeb strategol am gydgysylltu TGCh;
- Cronfeydd Strwythurol.

## **Blaenraglen Waith**

3. Mae gwaith y Pwyllgor yn perthyn yn fras i ddau gategori – craffu ar waith Llywodraeth Cynulliad Cymru a'r Gweinidog dros Fenter, Arloesi a Rhwydweithiau, a chyfrannu at y broses o ddatblygu polisiâu drwy gynnal adolygiadau polisi a thrwy gadw golwg ar faterion sy'n codi ac ymateb iddynt. Yn ymarferol, mae'r eitemau ar yr agenda yn aml yn cynnwys agweddau ar y ddau.

4. Ochr yn ochr â'r rhain, mae gan y Pwyllgor nifer o swyddogaethau parhaus:

- cael adroddiadau rheolaidd gan Weinidog y Cynulliad a'u hystyried;
- ystyried cynigion ar gyfer cyllideb y Cynulliad;
- ystyried is-ddeddfwriaeth a deddfwriaeth yr UE yn ôl y galw.

## **A) Craffu**

5. Bydd y Pwyllgor yn cael adroddiadau ar faterion cyfredol a phwysig gan Weinidog y Cynulliad ym mhob un o'i gyfarfodydd, a bydd yn trafod yr adroddiadau hynny.

6. Bydd yn achub ar y cyfleoedd hyn i graffu'n rheolaidd ar waith y Gweinidog, ei bolisiâu, a'r modd y cânt eu gweithredu.

7. Bydd yn cael adroddiadau rheolaidd gan y Gweinidog a Chadeiryddion Pwyllgorau Monitro'r Rhaglenni ar hynt gwahanol raglenni cymorth Ewropeaidd a bydd yn cadw golwg fanwl ar berfformiad y rhaglenni.

8. Bydd yn craffu ar unrhyw drefniadau newydd ar gyfer y Cronfeydd Strwythurol ar ôl 2006, ynghyd â goblygiadau canlyniadau'r adolygiad o'r Canllawiau ar Gymorth Rhanbarthol.

9. Bydd yn monitro effaith uno Awdurdod Datblygu Cymru a Bwrdd Croeso Cymru â Llywodraeth Cynulliad Cymru.

10. Bydd yn cadw golwg gyffredinol ar ddeddfwriaeth sylfaenol, is-ddeddfwriaeth a deddfwriaeth Ewropeaidd o fewn ei faes cyfrifoldeb ac yn craffu'n fanylach ar eitemau y mae'n eu hystyried yn briodol.

## **B) Datblygu Polisi**

11. Bydd y Pwyllgor yn cyhoeddi ei adolygiad o Bolisi Gwyddoniaeth yng Nghymru.
12. Bydd yn parhau i gynghori'r Gweinidog ar ddatblygu'r meysydd polisi a nodir o fewn Cymru - Economi yn Ffynnu.
13. Bydd yn cadw llygad ar hynt strategaeth Blaenau'r Cymoedd – 'Blaenau'r Cymoedd ar y Blaen'.
14. Bydd yn ystyried yr ymateb gan y Gweinidog ar yr argymhellion a wnaethpwyd yn ei adolygiad o'r Polisi Gwyddoniaeth ac yn ystyried sut y bydd yn monitro hynt gweithredu'r argymhellion.
15. Bydd y Pwyllgor yn parhau i gadw llygad, ac fel bo'n briodol yn cynghori ar, faterion pellach sy'n codi mewn cysylltiad â'r argymhellion mewn adolygiadau blaenorol gan y Pwyllgor.
16. Bydd yn monitro cynnydd gydag adolygiad y Gweinidog o'r polisi trafndiaeth ac yn benodol yn ystyried yn fanylach y cysylltiadau ffyrdd a rheilffyrdd yng Nghymru.
17. Bydd yn monitro cynnydd gyda'r Strategaeth Diwydiannau Creadigol a gweithrediad y gronfa ynghyd â Strategaeth Band Eang Cymru a datblygiadau cyffredinol yn y maes hwn.
18. Bydd yn cynghori ar flaenoriaethau'r Gweinidog ar gyfer gwaith a wnaethpwyd yn flaenorol gan Awdurdod Datblygu Cymru a Bwrdd Croeso Cymru.
19. Bydd yn edrych yn fanylach ar effaith a datblygiad y diwydiant Awyrofod yng Nghymru.
20. Bydd yn cadw golwg gyffredinol ar hynt polisiâu'r UE, yn enwedig ar effaith ehangu a chydlyniant.
21. Bydd yn cadw golwg ar ddatblygiad economi Cymru, ac yn cynghori arno, gan ymateb i faterion brys neu faterion pwysig yn ôl y galw.
22. Bydd yn cynghori ar faterion cyllidebol ac ariannol, deddfwriaeth, penodiadau a materion eraill yn ôl y galw, a hynny yn unol â'r Rheolau Sefydlog.
23. Bydd yn ceisio cynnal o leiaf ddau gyfarfod ffurfiol y flwyddyn y tu allan i Gaerdydd.

## **Cyfrifoldebau Statudol**

24. Mae Deddf Llywodraeth Cymru 1998 yn gosod dyletswyddau penodol ar Gynulliad Cenedlaethol Cymru, a bydd y canlynol yn llywio gwaith y Pwyllgor:

- Cyfle Cyfartal - cynhelir cyfarfodydd y Pwyllgor yn gyhoeddus ac yn achlysurol y tu allan i adeilad y Cynulliad Cenedlaethol er mwyn gwneud ei fusnes yn fwy hygyrch i bobl ledled

Cymru. Bydd y Pwyllgor yn rhoi sylw i gyfle cyfartal wrth fynd i'r afael â'r holl faterion yn ei bortffolio.

- Datblygu Cynaliadwy - yn ei drafodaethau, bydd y Pwyllgor yn canolbwyntio ar yr angen i gydbwyso twf economaidd a chymdeithasol gyda chadwraeth yr amgylchedd, drwy ddatblygu cynaliadwy. Bydd argymhellion ei adolygiadau polisi yn adlewyrchu'r egwyddor hon.

## Atodiad A

### Cyfrifoldebau'r Pwyllgorau Pwnc

1. Mae rheolau sefydlog 9.7 a 9.8 yn nodi cyfrifoldebau'r Pwyllgorau Pwnc:

9.7 Bydd pob pwyllgor pwnc

- yn cyfrannu at ddatblygu polisiâu'r Cynulliad o fewn y meysydd y mae'r Ysgrifennydd Cynulliad perthnasol yn atebol i'r Cynulliad amdanynt;
- yn cadw llygad ar y gwariant a'r weinyddiaeth sy'n gysylltiedig â'u gweithredu; a
- yn cadw llygad ar waith cyflawni'r swyddogaethau cyhoeddus yn y meysydd hynny gan gyrrff cyhoeddus, gwirfoddol a phreifat

9.8 O fewn y meysydd perthnasol, bydd pob pwyllgor pwnc hefyd,

- yn cynghori ar ddeddfwriaeth arfaethedig a fydd yn effeithio ar Gymru, gan gynnwys cyflawni ei swyddogaethau o dan Reol Sefydlog 22;
- yn rhoi cyngor i Gabinet y Cynulliad ar faterion sy'n ymwneud â dyrannu cyllideb y Cynulliad yn unol â Rheol Sefydlog 19;
- yn cyflawni ei swyddogaeth o dan reol sefydlog 21 (cwynion);
- yn cyflawni unrhyw swyddogaethau a neilltuir iddo o dan y Cod Ymarfer ar Weithdrefn Penodiadau Cyhoeddus a wneir gan y Cynulliad o dan Reol Sefydlog 20; a
- yn ystyried materion y bydd y Cynulliad yn eu cyfeirio ato o fewn ei feysydd."

2. O dan Reol Sefydlog 9.9, rhaid bod gan bwyllgorau pwnc raglen waith dreigl a fydd yn cwmpasu cyfnodau o 12 mis o leiaf.